

- b) (v/42% lána) 32/42 hlutar af nafnverði ógjaldfallins höfuðstóls, eins og hann er 2. nóvember 1981, margfaldaðir með byggingarvísitölu á afgreiðsludegi hins nýja láns deilt með byggingarvísitölu á afgreiðsludegi efra láns.

Andvirði hinna nýju lána gengur til lækkunar á ógjaldföllum höfuðstól þeirra lána, sem breyta skal.

Hin nýju lán skulu tryggð með 1. samhliða veðrétti í viðkomandi fiskiskipi og vera með þeim kjörum, sem í gildi verða á almennum skipalánnum í sjóðnum á afgreiðsludegi þeirra. Heimilt er stjórn sjóðsins þó, að krefjast frekari trygginga ef hún telur það nauðsynlegt. Gjald dagar lána þessara skulu vera 1. maí og 1. nóvember ár hvert. Síðasti gjalddagi hinna nýju lána skal vera á sama ári og síðasti gjalddagi þeirra lána sem breyta skal.

Umsóknir um lán þessi skulu hafa borist sjóðnum eigi síðar en 31. desember 1981 og skal afgreiðsla þeirra vera lokið fyrir 1. apríl 1982.

2. gr.

Reglugerð þessi er sett samkvæmt lögum nr. 44 25. maí 1976, um Fiskveiðasjóð Íslands til þess að öðlast þegar gildi og birtist til eftirbreytni öllum þeim, sem hlut eiga að máli.

Sjávarútvegsráðuneytið, 28. október 1981.

Steingrímur Hermannsson.

Jón L. Arnalds.

2. nóvember 1981.

Nr. 629.

REGLUGERÐ

um einkennisfatnað fangavarða.

1. gr.

Einkennisfatnaður fangavarða í fangelsum og vinnuhælum skal vera sem hér segir:

1. Húfa skal vera úr hvítu efni með 5 cm breiðri uppistandandi gjörð, 5 cm breiðri reisu, kringlóttum hvítum flötum kalli, gljáleðursskyggni og hökuól, er fest sé á gjörðina með tveimur einkennishnöppum af minni gerð. Á gjörðinni skal vera svartur borði úr upphleyptu efni. Framan á borðanum og upp á reisinna skal vera skjaldarmerki Íslands úr málm, gyllt, 4 cm á hæð.
2. Jakki skal vera úr svörtu klæðisefni, með venjulegum kraga einhnepptur með þremur einkennishnöppum af stærri gerð. Á jakkanum skulu vera tveir hliðarvasar og einn brjóstvasi vinstra megin. Einnig skulu vera tveir innri brjóstvasar.
3. Vesti skal vera úr sama klæðisefni og jakkinn með fjórum vösum, hneppt með einfaldri röð einkennishnappa af minni gerð, 5 að tölu.
4. Buxur skulu vera úr sama klæðisefni án uppbrota, með fjórum vösum.
5. Kápa skal vera úr svörtu rykfrakkaefni, einhneppt, fóðruð, hnésíð og með tveimur vösum.
6. Frakki skal vera úr svörtu frakkaklæði, einhnepptur með 4—5 einkennishnöppum og rennilás innra, gærufóðraður, $\frac{3}{4}$ hnésíður með loðkraga og tveimur vösum.

7. Skyrtur skulu vera úr ljósbláu efni, með axlaborða.
8. Hálsbindi skulu vera svört.
9. Fangaverðir skulu nota svartan skófatnað og klæðast svörtum sokkum ef þeir eru í lágum skóm.

2. gr.

Einkennismerki skulu vera:

1. **Einkennishnappar**, gylltir með upphleyptri mynd af merkinu „hönd og auga“. Þeir eru í tveimur stærðum, minni 16 mm og stærri 21 mm í þvermál.
2. **Húfumerki**, gyllt skjaldarmerki Íslands, 4 cm á hæð.

3. gr.

Stöðueinkenni skulu vera:

1. **Auðkennisnúmer**. Stafir númeranna eru gylltir, 19 mm á hæð. Þau skulu borin í jakka fyrir ofan brjóstvasabrún, í vesti eða í skyrtu á sama stað vinstra megin og í frakka og kápu á svipuðum stað vinstra megin.
Auðkennisnúmer skulu allir starfsmenn bera aðrir en forstöðumaður og skulu þau ávallt vera sýnileg.
Starfsaldur skal ráða röð númera þannig að sá fangavörður sem lengstan hefur starfsaldur skal bera lægsta númerið. Þar sem starfsaldur er jafn skal lífaldur ráða.
Ein sjálfstæð númeraröð skal vera við hvert fangelsi eða vinnuhæli.
2. **Stöðueinkennisplötur**, gylltar 21 mm × 7 mm að stærð. Þær bera flokksstjórar festar langsum í gegnum brjóstvasabrún.
3. **Stöðueinkennisstjörnur**, gylltar 5 arma, 10 mm hver armur. Varðstjórar og aðstoðaryfirfangaverðir skulu bera eina stjörnu í gegnum brjóstvasabrún, yfirfangaverðir tvær stjörnur og forstöðumenn skulu bera þrjár stjörnur.
4. Forstöðumenn annast úthlutun stöðueinkenna.

4. gr.

Fangaverðir skulu klæðast einkennisbúningi við dagleg störf í fangelsinu. Heimilt er þeim sem hafa umsjón með útivinnu fanga að klæðast hlífðarfötum utanyfir einkennisbúning. Heimilt er að veita undanþágu frá notkun einkennisbúninga í vinnuhælum, ef aðstæður eru þannig að slíkt sé æskilegt að mati ráðuneytisins.

5. gr.

Fangaverðir í fullu starfi sem ráðnir eru til a. m. k. eins árs í fasta stöðu, skulu fá afhent ókeypis einkennisföt sem hér segir:

1. Í upphafi starfs fá þeir tvenn einkennisföt, en síðan ein á 12 mánaða fresti. Með einkennisfötum er hér átt við einn jakka, eitt vesti, tvennar buxur, tvær skyrtur og eitt bindi.
2. Í upphafi starfs fá þeir kápu og frakka. Síðan fá þeir kápu á 12 mánaða fresti en á 36 mánaða fresti fá þeir frakka í stað kápu.
3. Húfu fá þeir í upphafi starfs og síðan á 36 mánaða fresti eða oftár telji yfirmaður þess þörf.

Þeir sem ráðnir eru til afleysinga eða til þriggja mánaða skulu fá afhent ókeypis ein einkennisföt, sbr. 1. tl. 1. mgr., eina kápu og húfu.

Forstöðumenn skulu sjá um að láta starfsmönnum í té einkennisfatnað eftir tilvísun ráðuneytisins. Þeir skulu halda skrá yfir afhentan einkennisfatnað.

6. gr.

Venjulegt viðhald einkennisfatnaðar annast starfsmenn sjálfir. Þeir skulu þó fá greiddar tvær fatahreinsanir á ári, svo og aðrar hreinsanir á fatnaði sem forstöðumaður telur þörf á vegna sérstakra atvika. Meiriháttar tjón á einkennisfatnaði skal bæta sérstaklega.

7. gr.

Þegar fangavörður lætur af starfi skal hann skila þeim einkennisfatnaði sem hann fékk síðast afhentan, svo og húfum og einkennum.

Einkennisfatnaður sem fastráðinn fangavörður hefur fengið afhentan og hann hefur notað í meira en tvö ár, telst eign hans að liðnum tveimur árum frá afhendingu.

8. gr.

Einkennisföt þau sem fangaverðir nota við gildistöku reglugerðar þessarar er heimilt að nota til ársloka 1983.

9. gr.

Reglugerð þessi sem sett er samkvæmt 13. gr. laga nr. 38/1973 um fangelsi og vinnuhæli, öðlast gildi 1. janúar 1982.

Dóms- og kirkjumálaráðuneytið, 2. nóvember 1981.

Friðjón Þórðarson.

Þorsteinn A. Jónsson.

30. október 1981.

Nr. 630.

AUGLÝSING

um gjaldskrá fyrir sundstaði í Reykjavík.

Einstakir miðar, fullorðnir	kr. 7,00
Einstakir miðar, börn	— 3,00
10 miða kort, fullorðnir	— 44,00
10 miða kort, börn	— 13,00
10 miða kort, aldraðir	— 22,00
Gufubað	— 12,00
Leiga á handklæðum og skýlum	— 6,00
10 miða kort sundfélaga 16 ára og eldri	— 14,00
10 miða kort sundfélaga yngri en 16 ára	— 7,00

Gjaldskrá þessi staðfestist hér með samkvæmt lögum nr. 32 7. maí 1928 til þess að öðlast gildi þegar í stað.

Jafnframt er úr gildi felld gjaldskrá nr. 462 31. júlí 1981.

Félagsmálaráðuneytið, 30. október 1981.

F. h. r.

Jón S. Ólafsson.

Jón Sigurpálsson.